

四庫全書

史部

欽定四庫全書

史部

王端毅奏議卷一

詳校官侍講學士臣法式善

編修臣裴謙覆勘

總校官進士臣繆琪

校對官中書臣葉葵

謄錄監生臣江晉

欽定四庫全書

史部六

王端毅公奏議

詔令奏議類二 奏議之屬

提要

臣等謹按王端毅公奏議十五卷明王恕撰恕有石渠意見已著錄恕吏部奏議九卷宏治四年文選郎孫交編次李東陽序之後兵部尚書王憲取其自大理寺左寺副至南京兵部尚書時奏議六卷刻于蘓州御史程啓

元又刻于三原此本則正德辛巳三原知縣
王成章合二本而刻之者第一卷為大理寺
及巡撫荆襄河南時所上二卷為南京刑部
戶部及總理河道時所上三卷為雲南巡撫
時所上四卷為前叅贊幾務時所上五卷為
巡撫南直時所上六卷為後叅贊幾務時所
上七卷至十五卷皆吏部所上劉昌懸笥瑣
探稱恕歷仕四十五年凡上三千餘疏則此

猶汰而存之者矣明史恕本傳稱其敷歷中
外五十餘年剛正清嚴始終一致集中所載
如叅奏鎮守太監及論中使擾人等疏皆剴
切直陳無所回護又如處置地方及撥船事
宜諸狀皆籌畫詳盡具有經畧其他亦多有
關一時朝政可資史傳之叅証沈德符顧曲
雜言稱邱濬作五倫全備雜劇王恕謂其程
學大儒不宜留心詞曲濬大恨之遂謂恕所

刻疏稿凡成化間留中之疏俱書不報故彰
先帝拒諫之失侍醫劉文泰因此事疏攻
恕恕因去位所以報恕之輕詆也明史恕傳
則謂二人因爭坐位故搆是獄紫濬本狠忮
恕一日不去則濬一日不得快其私其忌恕
未必以此數語亦未必以此一事然恕亦殊
乖避人焚草之意故史謂其昧於遠名之戒
今刊本已無此二字或後來削之歟乾隆四

十三年五月恭校上

總纂官臣紀昀臣陸錫熊臣孫士毅

總校官臣陸費墀

金匱要略全書



提要

王端毅奏議序

周官冢宰即唐虞百揆之職雖列於六曹而實總衆務
歷代宰相之設則別立六曹以隸之迨於我朝始不置
相然所謂吏部尚書者獨為六部之長所領人才又天
下首務非他政事比蓋大臣之最重者也故非德足以
格君正國才足以察理辨物者莫宜為之顧世遠制異
天下事不盡于都兪吁咈之間則必假於辭而後能達
於是謨訓之體變為章疏為題為奏代代有之晉山濤

有所銓注必先啟而後奏宋趙普有所薦而不用則拾殘藁復上之者皆是物也今部曹所奏朝報所錄人皆傾耳而聽之今日行某事事之善者必曰吾君之仁也明日用某人之賢者必曰吾君之明也是雖書簿格例之細而所謂格君正國者亦於是闕焉固諸曹之所同而在吏部為尤重也今天子御極之初三原王公復召為吏部尚書進太子太保天下翕然望之而公亦毅然以天下人才為己任凡有會議必手自屬藁雖部曹

所擬官屬所具亦親為改訂四三年來散於諸司者不可悉記文選員外郎孫君交擇其關於政之大者萃為一編以藏於家東陽得而觀之則歎曰於乎盛哉臯陶論知人必曰載采孟子言尚友必曰論世後之人聞公之風不獲見其人而接其論言者必於是觀之而一代之盛亦從可識矣東陽承乏翰林脩兩朝實錄皆在史館蓋自正統以來迄於成化選舉之典式人才之名籍未嘗不得與也聖天子之休風善政大臣元老之嘉謨

偉績乃復於今日見之敢不為天下賀哉且難進易退
公之夙心而眷注方切未可以言去則所以益於君與
國者尚多又敢不益為天下望之哉公自立朝累有獻
納在南部者尤為天下所傳誦則既編為別卷而序之
者已詳故獨識於此庶公之任以天下者有所參考云
弘治四年夏四月望日賜進士出身奉議大夫左春坊
左庶子兼翰林院侍講學士經筵講官兼修國史長沙
李東陽序

欽定四庫全書

王端毅奏議卷一

明 王恕 撰

大理寺

申明律例奏狀

臣備員棘寺叨司審錄常愧無分寸之補奚敢有出位之思竊見法司中日逐擬斷之事揆之律例雖無不合推之人情亦有未宜今略舉一二昧死妄言伏望聖明少賜裁決著為定例庶幾事得其宜而人易遵守開坐

具本謹題請旨

一件祛除凶德事臣惟姦盜凶德也凡人有一於身
人皆賤之恥與為伍况堂堂清朝豈可容此之徒
承襲世祿而玷辱聖化乎竊照軍職中間守分盡
職者固多而為姦作盜者不少且姦與盜名雖不
同實則相等查得見行事例軍職犯縱容及抑勒妻
女與人通姦者俱照敗倫傷化事例革職為民許
令應襲弟男子姪替職其犯竊盜掏摸搶奪盜官

畜產者法司因無事例止照常例發落仍令還職
實是玷辱名爵有傷風化如蒙准言乞勅該部同
三法司計議除已發落外合無將今後軍職有犯
竊盜掏摸搶奪盜官畜產者如律罪之亦照敗倫
傷化事例革職為民許令應襲弟男子姪替職如
此則世祿及忠良之士在官無凶德之人矣

一件抑勒為娼事伏覩大明律內一款抑勒妻妾及
乞養女與人通姦者本夫義父各杖一百姦夫杖

八十婦女不坐並離異歸宗其抑勒子孫之婦與人通姦者罪亦如之欽此竊照有等無廉恥之徒抑勒妻妾及乞養女并子孫之婦與人通姦討錢使用其妻妾及乞養女并子孫之婦堅執不從被其逼打不過纔方將情具告法司因見不曾成姦律不該載止坐不應杖罪仍令婦人隨住竊詳此等婦女思係良家不肯從伊為娼志節貞潔誠為可嘉今既具告到官意在脫免污辱若謂未曾成

姦仍令隨住彼必得志仍前抑勒稍有不從輒加
捶楚以此婦女剛強不屈者必至死地柔善軟弱
者終被污辱實是敗壞人倫有傷風化如蒙准言
乞勅三法司計議合無將今後但係抑勒妻妾及
乞養女并子孫之婦與人通姦雖未成姦取問明
白就令婦女離異歸宗若婦女誣告亦依律罪之
如此則凶徒不得肆姦而良善庶免污辱矣

一件囚人納紙事照得法司見行事例除真犯死罪

竊盜并逃軍逃匠逃囚不納紙劄外其餘一應罪囚各納紙一分入官竊詳立法初意蓋謂逃軍逃匠逃囚多是窮苦小人以此免其納紙今照報効義勇民壯舍餘勇士力士人等名雖與軍不同其實與軍一般操備征進為事一般照例發遣守哨法司因見前例不曾除豁亦令納紙未免破費盤纏實是窮苦不堪及有一家同居人口被人牽告三兩口在官者有之五七口者亦有之發落之時

每人各納紙一分且民紙一分直銀三四錢官吏
紙一分直銀一兩富貴者固不為事貧難者從何
措辦甚至傾財破產鬻男賣女若此窮苦實可矜
憐如蒙准言乞勅三法司計議合無將今後問擬
在逃報効義勇民壯舍餘勇士力士人等俱照逃
軍事例免其納紙及一家同居人口有犯不分人
數多少只令納紙一分如此則窮苦小人不致失
所矣

一件囚徒會赦事伏覩景泰三年五月初二日詔書
內一款官吏軍民人等為事問發運米做工等項
悉行放免欽此該衙門因見詔書不曾開有煎鹽
炒鐵充軍伴儀從膳夫之類止將運米做工等項
放免却將煎鹽炒鐵之類仍前拘役竊詳運米做
工與煎鹽炒鐵等項囚徒俱係犯該徒流并雜犯
死罪人數止是一時發落有此頭項不一矧詔書
明開運米做工等項竊恐煎鹽炒鐵之類亦在其

中若止將運米做工囚徒放免其餘煎鹽炒鐵等項不行放免非惟有違詔書事意且使囚徒不得均霑贖蕩之恩况煎鹽炒鐵等項多是窮苦軍民在工日久未免逃躲及至族拏又不出官工役處所既不得其出力原籍原衛又不得伊當差兩相擔閣俱不得用徒有虛名實未便益如蒙准言乞勅三法司計議合無將曾經赦煎鹽炒鐵充儀從軍伴膳夫等項囚徒悉與運米做工等項一體放

免如此則赦例無彼此之分因徒霑均一之恩矣
一件除姦革弊事竊照在京五府并各衛軍職官員
俸糧折支銀絹椒木等物每季俱係各衙門差委
指揮千百戶等官赴內府總領出外分散中間有
等無知委官不以錢糧為重惟務貪圖肥己多方
侵漁略無忌憚有指以置買什物而侵欺者有假
以抵還私債而剋落者或見彼軟弱而全不給與
或因人不在而就不送還宿弊百端難以枚舉及

至事發到官依法追問却乃展轉支吾不服招認
錢糧被其侵欺官府被其攪擾蓋緣給散之際無
有文職糾察得以縱意自由故也照得年例當賜
軍士冬衣布花俱差給事中御史并戶兵部官親
臨該衛眼同委官逐一唱名給散以此委官無由
侵欺軍旗受其實惠弊源既塞詞訟自息此法最
善實為便益如蒙准言乞勅該衙門計議合無今
後每季關領軍職折俸銀絹椒木之時照舊各差

委官赴內府關領到衛仍照給散冬衣布花事例
差給事中御史并戶兵部官分投督令委官將銀
兩照數分鑿成塊絹疋每分細作一束椒木每分
包作一處如法封記眼同委官逐一唱名給散如
此則侵欺之弊可革而告訐之風自息矣

一件僧道犯罪事伏覩大明律內一款僧道犯罪曾
經決罰者並令還俗欽此切照法司日逐問過僧
道但犯一應大小罪名不分故失并曾否決罰悉

令還俗其僧道官有犯因見律不該載止照常例
運糧運灰等項發落仍令還職臣惟僧道官主典
教門表率叢林比之僧道戒行尤宜精嚴持身尤
宜端謹僧道有犯既令還俗僧道官有犯豈可仍
令還職且人誰能無過若將過誤犯罪及因人連
累致罪并犯罪不曾決罰僧道一槩令其還俗竊
恐禁網太密下無全人如蒙准言乞勅該部同三
法司計議除已發落外合無將今後僧道官并僧

道有犯公罪并過誤犯罪及因人連累致罪者俱照常例運糧運灰等項發落仍令還職復業其犯姦盜詐偽并一應故犯罪名俱照常例運糧運灰決罰等項發落不分僧道官與僧道一體罷職還俗如此則事例得適中之宜僧道少故犯之徒矣

景泰五年九月初三日題奉聖旨三法司計議停當行

撫治荆襄

處置地方奏狀

先准兵部咨該本部奏准行令臣等候賊寇搜勦盡絕之日就行會議區畫久長安治良策差人奏請定奪除欽遵外臣會同監督軍務太監唐慎右少監林貴提督軍務工部尚書白圭總兵官撫寧伯朱永左叅將都督同知喜信右叅將都督僉事鮑政等議得荆襄一帶山林深險土地肥饒刀耕火種易於收穫各處流民僧道人等往往逃移其中用強結菴立產官吏不敢科徵里

甲不敢差遣以致驕慢日生縱橫日熾荼毒生靈以天命為不足畏謀為不軌以國法為不足遵茲者仰賴皇上聖德神威賊寇俱已殄滅若不乘時處置抑恐餘蔓復滋重貽後患緣係該部奏准行令臣等會議區畫久長安治良策奏請定奪事理未敢擅便今將處置地方緣由逐一開坐具本順差指揮同知石湧親齎謹題請
旨

一襄陽荊州三衛并夷陵千戶所官軍永樂宣德

年間俱在本處操守地方彼時山中雖有流民畏懼軍衛不敢嘯聚為非正統十四年為因摘調鎮遠靖州等衛官軍前去麓川雲南等處征進致令邊城缺守苗賊出沒該總督軍務都御史王來等奏准暫將荆襄等衛官軍調去彼處分作兩班輪流備禦候邊衛清勾軍士足伍之日另行定奪隨後又將三班軍餘亦調前去征進今已十五六年邊衛隊伍計必完足前項官軍仍舊輪班一向本

處城池空虛武備廢弛以致賊首千斤劉等得以伺隙為非今雖殄滅勞費實多看得前項衛所除運糧并頭班備禦官軍外其二班三班官軍餘丁每衛不過七八百名合無令頭班官軍照舊前去備禦將二班三班官軍餘丁存留本處操守城池振揚威武遇有警急易於調用如此則盜賊知所畏懼而地方可以永寧矣

一襄陽府房縣僻在萬山之中離府八日之程所轄

地方有歇馬大市螳螂溪格兜坡潭頭坪馬腦關
三扒峪梯兒崖頭沙河湯家河洞庭廟玉女廟長
口榔口馬欄青峯壽陽栢木前坪後坪洪坪等處
土地肥饒道路險阻各處流移人戶在彼潛住者
不下萬數近者賊首千斤劉等一起衆皆響應相
從為非查得比先年間因見本縣山水險惡流民
數多盜賊不時生發所以設立一千戶所在彼守
禦後因節將官軍餘丁差調各邊備禦征進并漕

運去訖止留老弱殘疾之人不堪防禦致賊窺伺
為患且前項地方溪水雖多灘浪峻急舟楫不通
漕運艱難合無將本所原調各邊備禦征進并運
糧官軍盡數掣回本所操守城池振揚軍威遇賊
生發易為調遣撲滅其該所原發運糧官軍宜從
巡撫三司等官計議於各衛另行照數撥補如此
則城池有人操守而緩急不致悞事矣

一襄陽府均州地里當四方之中與竹山房縣上津

鄖縣穀城光化相為唇齒本州地方流民比竹山房縣等處流民不相上下彼有警則此戒嚴此缺守則彼警擾自然之勢無足怪者本州原設一千戶所官軍一以守禦本處地方一以控制附近縣分永樂年間奉勅全存修理宮觀一應備邊征進軍糧等項俱不差調切緣太嶽太和山宮觀在前用工修蓋完固即今煥然如新中間縱有損壞用工不多查得本所實有食糧正軍一千二百餘員

名餘丁三千餘名雖稱有輪班修理之名其實歇役在閑不曾做工合無將正軍盡數令其在城日逐操練振揚軍威遇有本處并隣近縣分賊盜生發聽分巡分守等官調度勦捕各處并邊方有警及運糧等項不許一槩差調其餘丁三千餘名照舊輪班修理遇有大營造之時仍令正軍盡數用工如此非惟可以保障一方軍民亦可以防護各山宮觀矣

一襄陽府均州南漳穀城竹山鄖縣上津房縣等處
荊州府當陽遠安等處俱有各處流移人戶并逃
軍逃囚人等帶領家小在彼耕種趁食躲住逃年
結構為非均房二處各有千戶所守禦鄖縣上津
竹山三處俱離均房二千戶所不遠穀城南漳離
襄陽衛不遠當陽離夷陵千戶所不遠惟遠安縣
西北抵房縣千戶所五百餘里西南抵夷陵千戶
所二百八十里東南抵荊州三衛三百四十餘里

又離荊州南漳當陽等州縣俱各寫遠况本縣止
有一里半民遇有賊盜生發急無官軍救援照得
已革去荊州護衛官軍見在荊州三衛帶管合無
於內查屯田近遠安者摘調一千戶所發去遠安
縣與民相兼用工修築城池設立千戶所衙門守
禦地方如全所不勾一千戶所就於別所轄撥遇
賊生發隨即撲捕如此則軍威彼此相接而盜賊
不敢輕動矣

一襄陽府房縣南漳穀城襄陽四縣荊州府當陽縣
地方接連陝西四川河南疆域廣闊道路險阻要
害去處因無巡司盤詰以此各處流移人戶逃軍
逃囚僧道人等往往來彼或開山耕種或結菴居
住停藏年久聚集為非看得房縣板橋山穀城縣
石花街南漳縣七里頭襄陽縣油枋灘當陽縣漳
河口俱係強賊出沒流民經行緊關去處合無前
項地方每處設立一巡檢司照例銓官撥吏就於

該縣僉點弓兵一百名令其常川盤詰往來巡視
除住種年久附籍已定流民聽其本分生理外其
不肯附籍者發回原籍當差造作非為者挈送官
司治罪私自結菴僧道就將菴舍拆毀有度牒者
遞送原出家寺院識認住坐無度牒者解發本管
官司問罪還俗遇有賊盜生發就便相機撲滅仍
仰嚴加禁約今後各處趨食流民僧道一應無文
引之人俱不許擅入前項山場巡司官兵人敢有

假公營私生事害人者許巡按御史并按察司分
巡官挈問如律如此則控制有人而流移不復聚
衆關防嚴謹而賊盜日漸消沮矣

一襄陽府均州竹山鄖縣上津南漳穀城棗陽光化
宜城荊州府當陽遠安等州縣在前因是土民不
及里數俱係裁減衙門州設知州判官吏目縣設
知縣典史竊照各州縣土民雖少而地土廣闊中
間趁食流民屯田軍餘與土民叅雜住種者不計

其數詞訟日逐紛紜盜賊不時生發原設官員俱
全尚且分理不周一遇公差考滿等項輒委雜職
官員署事非惟不能幹辦公務抑且因而侵漁百
姓以致事多耽悞民多受害合無將前項裁減州
縣州添設同知一員縣添設縣丞一員令其專一
撫安人民緝捕盜賊防革姦弊如此不惟撫捕二
事責有所歸而一應公務舉無所失矣成化二年
十月初十日具題奉聖旨俱准行

查勘失機官員功罪奏狀

准兵部咨該欽差都察院右副都御史王恕題先准兵部咨該襄王秦成化元年九月初八日臣為封內房縣賊人殺傷差去勦捕軍人攻犯本縣城池已差百戶胡榮具奏其後強賊縱橫自房縣至南漳數百里內放火劫掠殺傷軍民搶去盔甲火藥等器攻陷南漳燒毀縣內居民房屋官吏人民驚惶奔走深被其害等因具奏該本部官於奉天門欽奉聖旨前日王奏賊情已勅湖廣

總兵等官調兵勦捕今又奏賊情緊急武備多缺且將
荆襄安陸五衛運糧官軍存留本處操守殺賊還寫書
報王該部知道欽此欽遵抄出送司案呈到部看得襄
王所奏除已欽遵聖斷施行外照得湖廣都布按三司
等衙門怠慢慢事都指揮王英叅議劉子鍾僉事郁文
博并知府干璠指揮孫能千戶曹宗李俊李全百戶曹
政韓忠尹釗等雖該本部先已議奏行令都御史王恕查
勘明白叅奏究治緣今既因各官互相怠慢致賊如此

若不另為處置誠恐各官無所畏懼因而愈加悞事未便合無行移都御史王恕著令各官住俸做為事官上緊協力殺賊候前賊勦捕畢日將各官前項悞事實跡并有無殺賊功勤緣由通行查勘明白具奏定奪等因具題成化元年十月二十日本部尚書王復等於奉天門奏奉聖旨是即行文書去欽此欽遵移咨到臣除行湖廣都布按三司等衙門將指揮王英叅議劉子鍾僉事郁文博知府干璫指揮孫能千戶曹宗李全李俊百戶

曹政韓忠尹釗俸給俱自成化元年十一月初七日止
吏令做為事官上緊協力殺賊外行據分巡荆南道僉
事黃謹呈據襄陽府呈准本府通判趙茂牒准本府牒
抄蒙荆南道案驗會同襄陽衛委官指揮僉事薛通親
詣南漳房縣查勘行據房縣申據原日捕盜老人向友
恭并民壯地方知見人等王名等供結得先前強賊蔣
虎等三十三名在河南南陽府打劫民人李穩家財蒙
鄧州守禦千戶所差委應捕百戶周閭帶領旗軍緝至

襄陽府穀城縣會合本縣應捕委官醫學訓科李守忠督令火甲人等押帶原首人孫興等指引到金牛山挨捉賊首蔣龍等各賊知覺糾合強賊劉長孫等拒敵將委官李守忠打傷被賊搶去騎坐馬匹及將應捕軍餘郝端陳亮殺死各賊逃往陝西漢中府洵陽縣去訖後被守備漢中等處都指揮吳榮官軍追趕於成化元年七月內復回襄陽府竹山縣地面文峪河搶劫民人任皮家財該縣委陰陽訓術表壁帶領總甲盛謙等與和

尚招師一同向前與賊對敵內火夫柳廣等用藥箭將賊射死三人中傷五六人各賊發狠向前將原帶火夫聶景等并招師一十名殺傷身死本縣申府轉達右副都御史王恕處行委襄陽府知府干璫襄陽衛指揮孫能帶領官軍民壯人等協同前去被劫處所緝捕前賊當有捕盜老人向友恭等走報有前賊在湯頭關駐劄指揮孫能不候知府干璫到來商議就行輕率百戶曹政韓忠尹釗房縣千戶所應捕千戶曹宗各帶旗軍拘同

老人向友恭帶領火夫人等前去捕至馬欄鋪與賊對敵各不奮勇殺賊被賊殺死旗軍鄭信等一十名民夫五名被傷旗軍將所執軍器盡行丟棄各散有知府干璠委的未到不曾策應本年八月二十三日賊復到房縣城外攻城知府干璠指揮孫能并本所副千戶李全曹忠等石所百戶曹政韓忠尹釗因見賊勢兇惡關閉城門率領官軍民壯在於城上用火鎗弓箭射傷強賊五六人被賊在於城外劫掠財物燒毀軍民馮子智

等一十七家房屋至晚各賊退散去訖等因行間隨據
均州守禦千戶所申准本所副千戶李俊關奉衛帖該
抄蒙古副都御史王恕案驗備行本職照選精壯軍餘二
百名各帶鋒利器械聽候本衛指揮孫能親臨調用依
准點選過旗軍王槐等二百名於成化元年八月十九
日跟隨本衛指揮使孫能前到地名外朝山據本所原
差探信小旗時常等報稱強賊在於後川屯地名月竹
關圍營宿歇轉往站川去訖當蒙指揮孫能分撥本職

與同千戶高嶽周鼎姜禎旗軍蔣泰等一百五十三名
員分路徑往月竹關追捕內將旗軍鄭信等五十名跟
隨指揮使孫能前往房縣截捕前賊與賊對敵被賊殺
死旗軍鄭信等五名其千戶李俊在於月竹關捕賊未
曾到於房縣又據南漳縣申准原委捕盜陰陽訓術羅
道呈查得成化元年十月初四日強賊到於本縣之時
比有知府干璠先奉贊理軍務巡撫湖廣都察院左僉
都御史王儉劄付為水患事坐取回府踏勘災傷賑濟

饑民指揮使孫能在於中途舊縣鋪駐劄不曾到縣房
山千戶所千戶曹宗李全均州千戶所千戶李俊彼時
俱各回所未曾到縣止有襄陽衛百戶曹政韓忠尹釗
等在於本縣領旗軍人等與賊對敵被賊殺死本縣并
穀城縣民壯劉原等五名燒毀民人徐剛等一十五家
房屋劫去在監輕重囚犯鄒政等八名口搶去民人單
政等家馬六匹虜去民人鍾魁等家男女四名口及查
得前項強賊在於房縣南漳等處殺傷官軍攻劫縣治

之時有原委都指揮王英回司管事叅議劉子鍾在均州撫民僉事郁文博蒙巡按湖廣監察御史王璽取回科場去訖俱各不在不曾嚴督各官殺賊以致賊人將官軍民壯殺死等因取具該縣所官吏委官民壯火甲并原日對敵處所當地知見人等結狀回繳得此案照先准本府牒該承准荆南道故牒奉右副都御史王恕劄付前事備由移牒到職會同襄陽衛指揮蔣通行查勘去後今照前因擬合會案各另回報為此今將會勘過

緣由并取具各該官吏等結狀移牒本府轉繳到道據
此案照先節奉右副都御史王恕劄付案驗為強賊在山
拒捕殺傷軍民等事查勘各官悞事實情及轉行鎮守
湖廣總兵官都督同知李震分守荆襄等處右叅將都
指揮王信通查各官有無功勤去後今據繳報行間續
又節據襄陽府呈抄蒙分守荆襄等處右叅將都指揮
王信案驗開查先於成化元年十一月二十一日本職
分哨督統官軍前到房縣進兵勦寇間十二月初九日

強賊在於門樓頭駐劄與同僉事郁文博設意使令官軍前去劫營殺死賊人一百五十名內生擒賊人四十名器械二十八件官軍全勝回還有功成化二年正月二十三日忽有賊來房縣本職督同本官領軍在於城東外與賊對敵殺退賊衆奪回賊馬四匹器械三十二件至二十四日二十五日賊衆擁來攻城連日分投在於城上戰敵殺退賊衆殺死賊人五十五名保全孤城後有大軍進兵本官隨軍饋運糧儲節次勤勞有功

千戶李全李俊曹宗於成化二年正月二十二日賊衆擁來房縣攻城之時連日在於城上與賊對敵殺退賊衆保全城池及奉鎮守湖廣總兵官都督同知李震劉付查得成化元年十一月十四日攻進隘門關大木廠等處殺獲有功官軍內有都指揮僉事王英擒斬賊級二名顆右叅議劉子鍾生擒賊人一名知府干璫生擒賊人二名指揮孫能斬獲首級一顆百戶尹釗曹政韓忠俱係先當奪關等因及照得自成化二年二月以來

蒙欽差總兵官進兵勦殺賊寇之時有都指揮王英叅議劉子鍾在於穀城縣哨護糧道知府干璠在南漳縣理辦糧料指揮孫能百戶曹政韓忠尹釗俱在南漳縣守城各有勤勞等因具結呈繳到臣叅照都指揮王英叅議劉子鍾僉事郁文博知府干璠指揮孫能千戶曹宗李全李俊百戶曹政韓忠尹釗前項悞事實情既已查勘明白於法固當究治緣賊情今已寧息各官頗有前項功勤兼且悞事之罪犯在成化元年十一月二十

七日大赦以前緣係該部奏奉欽依候前賊勦捕畢日將各官前項悞事實情有無殺賊功勤緣由通行查勘明白具奏定奪事理未敢擅便具題又該右副都御史王恕題為緊急賊情事先准兵部咨該巡按湖廣監察御史王瀛等題臣到襄陽府南漳縣訪得都指揮陳昶成化二年二月初七日領軍到於資坪豎立排柵初八日果有賊人前來有陳昶預先怯弱分付頭目不許出敵將官軍民快俱令在於排柵內以待賊人到來方用火器

弓弩擊殺有賊首石和尚等止令數十賊人先來誘敵指揮梁昱不識詭計信以為實獨率二百餘人渡水迎殺賊人因見出戰軍少四下突出將梁昱所領軍快人等圍住陳昶見事危迫纔發兵策應以致被賊殺虜前項軍快人等數多得此叅照都指揮同知陳昶統領官軍快手二千員名遇賊不能奮勇一戰退縮怯弱而力主固守之謀指揮僉事梁昱不能算料賊情獨率二百餘人輕進易敵而獨恃血氣之勇號令既不歸一行

事又相矛盾以致賊人殺死軍人快手數多所據陳昶
梁昱等俱各查提問罪等因具題該通政司官奏奉聖
旨該衙門知道欽此該兵科抄出送司案呈到部叅照
巡按湖廣監察御史王瀛等奏稱都指揮同知陳昶指
揮僉事梁昱等俱合查提問罪緣由緣指揮同知陳昶
指揮僉事梁昱并各該領軍官員既有前項懷姦退縮
并輕進易敵失機悞事情由於法合當究治但今荆襄
賊寇猖獗正係用人領兵勦殺之際若將各官就便提

問誠恐缺人領兵因而悞事未便合無行移都御史王恕
著令各官住俸做為事人在彼領軍上緊協力勦殺前
賊候賊情寧息之日將各官失機悞事實情并有無殺
賊功勤緣由通行查勘明白具奏定奪等因具題成化
二年三月二十七日本部尚書王復等奏奉聖旨是欽
此欽遵移咨到臣除行湖廣按察司轉行湖廣都司將
都指揮同知陳昶辰州衛指揮僉事梁昱并各該領軍
頭目安陸衛指揮同知黃琛荊州右衛指揮使秦昭武

昌衛指揮同知李隆武昌護衛指揮僉事于鏞俸給任
支令其做為事官協力殺賊外行據分巡荆南道僉事
黃謹呈據委官襄陽府襄陽縣主簿曾忠呈抄蒙本道
紙牌該奉臣劄付前事行淮南漳縣牒拘得資坪地方
里老吳敬等到職審據各人供稱成化二年二月初五
日有健步尤繼海等報有強賊前來攻劫南漳縣當蒙
太監總兵都御史等官議調都指揮陳昶等統領官軍
二千員名於二月初七日出哨到於資坪河北駐劄監

立排柵為營初八日果有賊人前來委的都指揮陳昶預先分付指揮黃琛秦昭李隆于鏞等不許輕易出敵只在排柵內待賊到來方用火器弓弩擊殺有賊石和尚等先令數十餘賊從河南岸前來誘敵陳昶黃琛等俱在營內不敢出戰有指揮梁昱不能料敵獨領官軍二百員名渡水前去逆戰隨有快手總甲許真統領快手八十名前去策應賊人因見出戰軍快數少舉眾前來四面夾攻軍快奮勇殺死賊人約有四十餘名不曾

斬得首級奪回賊馬四匹被賊殺死快手二十六名軍人十名後太監總兵都御史等官又差都指揮蔡昇統率官軍二千員名前去策應賊勢稍却本日晚收軍回營當夜賊人復來劫營節被官軍用弩箭石砲打退初九日早太監總兵都御史等官又差指揮蔡英統領官軍一千員名前去應援舉放信砲鼓噪而進有賊首石和尚等聞知纔方向前詐說願投降等語隨即投散入山去訖今蒙查勘所供是實據供猶恐不的又據拘鄉

導陳華等到官再三研審覆實相同等因呈報到道案
照先奉右副都御史王恕劄付准兵部咨前事仰本職即
照開去為事官員從實查勘原先失機悞事實情有無
殺賊功勤緣由依奉已經行委本官查勘各官悞事實
情并行把總安陸衛指揮僉事蔡英查勘各官有無功
勤去後今據前因行間又據委官指揮蔡英呈查得指
揮梁昱于鏞李隆各於月日不等前進白洛河及格兜
坡等處俱各斬首三功數內秦昭亦係督軍殺賊之數

黃琛進哨之時蒙撥守備南漳并資坪等處往來防護搭架橋梁開修道路都指揮同知陳昶率領官軍自南漳起至潭頭坪擺堡往來哨護糧料擒獲賊人一名有功等因為照都指揮陳昶指揮梁昱于鋪李隆生擒賊犯并斬獲首級中間恐有不的行據襄陽府呈抄蒙紀工監察御史孫珂鄧本端案驗查得辰州衛指揮梁昱先於白洛河斬獲首級一顆後於格兜坡斬獲首級二顆及武昌衛指揮于鋪斬獲首級各三顆俱驗明白皆

准功次都指揮陳昶擒獲賊人一名李友俱各有功回
報到道備呈到臣叅照都指揮陳昶指揮梁昱于鏞李
隆泰昭黃琛前項失機悞事實情既已查勘明白論法
固當究治緣今賊情寧息數內陳昶梁昱于鏞李隆已
有前項生擒斬首功次泰昭亦曾督軍殺賊黃琛亦曾
守備南漳搭架橋梁開修道路頗効勤勞共成殺賊之
功緣係該奉欽依候賊情寧息之日將各失機悞事實
情并有無殺賊功勤緣由通行查勘明白具奏定奪事

理未敢擅便具題成化二年十一月初八日該通政司
官於奉天門奏奉聖旨該衙門知道欽此欽遵抄出送
司案呈到部叅照右副都御史王恕奏稱都指揮王英擒
斬賊級二名顆叅議劉子鍾生擒一名知府干璫生擒
二名指揮孫能斬首一顆百戶尹釗曹政韓忠俱當先
奪關僉事郁文博設意使令官軍劫營殺死賊人一百
五十名生擒賊人一十四人千戶李全李俊曹宗與對
敵保全城池各官頗有功勤兼且悞事之罪犯在赦前

及稱都指揮等官陳祖生擒賊人一名梁昱李隆于鏞
俱斬獲首級三顆秦昭亦曾督軍殺賊黃琛亦曾守備
南漳搭架橋梁開修道路頗効勤勞共成殺賊之功一
節緣各官先因失機悞事已該本部節次議奏令其俸
做為事官戴罪殺賊令副都御史王恕候賊平之日將各
官失機悞事實情并有無殺賊功勤查勘明白通行具
奏定奪今彼處地方既已寧息其右副都御史王恕自合
照依比先節次奉欽依內事理各將官查勘見某人有

何功蹟堪以贖罪某人應該奏問却乃將奪關并與賊對敵及督軍殺賊開修道路等項一槩作殺賊功勤朦朧具奏合無本部仍行本官令其公同巡按監察御史將各官逐一查勘要見某人功過相準相應寬貸某人罪重功微相應究問再行查勘明白各另具奏定奪等因具題成化二年十一月十五日本部右侍郎李震等於奉天門奏奉聖旨是欽此欽遵行移到臣查得兵部前項奏內先一次止稱合無行移都御史王恕著令各官

住俸做為事官上緊協力殺賊候前賊勦捕畢日將各
官前項悞事實情并有無殺賊功勤緣由通行查勘明
白具奏定奪後一次止稱合無行移都御史王恕著令
各官住俸做為事官在彼領軍勦賊候賊情寧息之日
將各失機悞事實情并有無殺賊功勤緣由通行查勘
明白具奏定奪別無令臣查勘各官某人有何功蹟堪
以贖罪某人應該究問緣由况賞罰乃人君之大柄非
臣下所敢專兵部原奏內不曾令臣如此擬奏臣豈敢

輕易妄擬以此臣止照欽依內事理將各官失機悞事
實情并數內王英劉子鍾陳昶梁昱等獲到功次及尹
釗等當先奪關秦昭督軍殺賊黃琛開修道路等項勤
勞具奏取自上裁今該前因欽遵公同巡按湖廣監察
御史王璽查得指揮孫能委的不候知府干璠到來商
議輕率百戶曹政韓忠尹釗千戶曹宗各帶旗軍火夫
人等捕至房縣馬欄鋪與賊對敵各不奮勇殺賊被賊
殺死旗軍鄭信等一十名民夫五名彼時知府干璠指

揮孫能千戶李全曹宗百戶曹政韓忠尹釗委因賊勢
兇惡關閉城門率領官軍民壯在於城上用火鎗弓箭
射傷強賊五六人被賊在於城外劫掠財物燒毀軍民
馮子智等一十七家房屋至晚退散去訖千戶李俊委
在月竹關捕賊不曾到於房縣其後強賊到南漳之時
知府干璠委蒙巡撫僉都御史王儉取回踏勘災傷賑
濟饑民指揮孫能委在中途舊縣鋪駐劄不曾到縣千
戶曹宗李全李俊彼時各俱回所止有百戶曹政韓忠

尹釗在彼領軍與賊對敵被賊殺死民壯劉原等五名
燒燬民人徐剛等一十五家房屋劫去在監囚犯鄒政
等八名口搶去民人覃政等家馬匹擄去民人鍾魁等
家男女四名口及勘得前項強賊在於房縣南漳等處
殺傷官軍攻劫縣治之時有原委都指揮王英回司管
事叅議劉子鍾在均州撫民僉事郁文博蒙巡按監察
御史王璽取回科場去訖俱各不曾督軍殺賊以致賊
人殺死官軍民壯其後官軍攻隘門關等處都指揮僉

事王英擒斬賊級二名顯右叅議劉子鍾生擒賊人一
名知府干璫生擒賊人二名指揮孫能斬獲首級一顆
僉事郁文博在於房縣設宴使令官軍前去劫營殺死
賊人一百五十名生擒賊人一十四名又督官軍與賊
對敵殺退賊衆奪獲賊馬殺死賊人五十五名千戶李
全李俊曹宗百戶尹釗曹政韓忠委與賊人對敵當先
奪關曾效勤勞又查都指揮陳昶等統軍到於資坪遇
賊委的陳昶同指揮黃琛秦昭李隆于鏞等俱在營內

不敢出戰有指揮梁昱不能料敵獨領官軍二百名渡水前去逆戰隨有快手總甲許真統領快手八十名前去策應共殺死賊人約有四十餘名被賊殺死軍快二十六名其後指揮梁昱于鏞李隆在於白洛河等處俱各斬首三功都指揮同知陳昶領軍擺野護哨護糧料擒獲賊人一名指揮秦昭委的督軍殺賊指揮黃琛委的守備南漳開修道路曾効勤勞看得都指揮黃英陳昶叅議劉子鍾僉事郁文博知府干璫指揮孫能梁昱

于鏞李隆既有前項殺賊之功堪以贖日前悞事之罪
相應寬貸指揮秦昭黃琛千戶李全李俊曹宗百戶尹
釗韓忠曹政罪重功微俱該究問緣數內李全李俊曹
宗尹釗韓忠曹政俱犯在成化元年十一月二十七日
大赦以前緣係欽依再問查勘明白具奏定奪事理未
敢擅便具本謹題

繳撫治流民勅諭奏狀

成化三年二月二十三日節該欽奉勅諭今特命爾巡

撫河南地方欽此照得先奉勅諭命臣撫治南陽襄陽
荊州三府流民已經欽遵督同司府州縣衛所官吏委
官取勘撫治無田地者區畫撥與無牛耕者措辦分給
無衣食者設法賑濟願入籍者編成里甲願復業者省
令秋成回還及將編過里甲安插過戶口撥過田地給
過牛種賑濟并願復業人戶數目具題外去年賊平之
後又經督令各該委官將被賊驚散者招撫復業詐冒
鄉貫漏報戶口等項者取勘明白應改正者就與改正

應附籍者仍編里甲應發遣者照例發遣去後今該欽奉前因除欽遵及行湖廣布政司撫民叅議劉子鍾徑自督屬委官撫治外今將原奉撫治流民勅諭進繳謹具奏聞計繳勅諭一道

陞左副都御史謝恩奏狀

成化三年三月十五日准本院咨為功次事該兵部題節該欽奉聖旨是王恕陞左副都御史欽此欽遵臣恕猥以庸材濫膺重寄偶遇山賊之狂悖幸賴天兵之勦

除慚無調度之功遽荷陞遷之寵感恩莫既揣分奚堪
願傾葵藿之誠敢效涓埃之報除望闕謝恩外謹具奏
聞

巡撫河南

區畫未完稅糧奏狀

行據河南布政司呈送造完天順八年以前未完稅糧
文冊到院看得冊內起運京倉等處未完者少存留各
府州縣未完者多伏覩成化元年十一月二十七日節

該欽奉詔書內一款各處軍民解納糧草農桑人丁絲
絹門攤商稅戶口食鹽米鈔并諸色課程除已到倉庫
上納外有納欠年久追賠未完者自成化元年十一月
以前悉皆宥免欽此除欽遵外今照前項拖欠天順八
年以前各年稅糧除起運京倉等處另行外其存留未
完之數中間雖有已經起解被里甲大户侵欺者亦有
輕收輕齎到於臨倉糴買攬頭誑騙不能完納者亦有
逃亡死絕人戶遺下之數里甲賠贖不起因被上司催

併緊急捏作徵完虛文起解者亦有委被水旱災傷申
告後時不蒙准理仍前催徵不曾上納者亦有責令細
戶自行送納不曾到倉者求其拖欠之故雖不同大抵
皆是納欠年久追賠未完之數遵依前項詔書事例俱
該宥免但緣有司惟恐倉廩匱乏供費不足又恐下人
作弊將已徵錢糧捏作未完希冀蠲免以此一槩不與
分豁節次行文催併去訖竊謂前項稅糧若是里甲大
戶侵欺雖令典田賣地賠贖完納亦不為過果係小民

拖欠例該宥免者若猶追徵非惟逼迫人難實是孤負
恩典況河南地方連年災傷人民艱窘原經收入戶有
名無實家道消乏者多雖稱在前侵欺糧價年久亦皆
費用不存若仍追徵本色縱使傾財破產鬻男賣女亦
恐賠納不起兼且本布政司官庫銀兩盡數送赴荆襄
軍前給賞軍士即今無他儲積非惟買辦等項缺價支
給萬一有緊急之用實難措置若不設法從宜處置錢
糧殆難完結官司徒自紛擾如蒙乞勅該部計議合無

行移河南布按二司各委堂上公正官員會同前去所屬欠糧府州縣督同各該官吏從公審勘天順八年以前各年存留稅糧除已納完外未納之數果係徵收在官已經起解被里甲大戶侵欺者照例每糧一石折收銀二錢五分煎銷成錠解赴本布政司上納收銷以備支用若是小民拖欠者俱照欽奉詔書內事理宥免如布按二司委官不行用心查勘縱用下人通同作弊許巡按監察御史叅奏拏問如此庶幾錢糧明白而小民

得霑恩惠庫藏贏餘而緩急不至悞用緣係委官查勘
未完稅糧折納銀兩事理未敢擅便成化三年四月十
五日具題

蝗生境內請避位因勸上去奢崇儉奏狀

據開封漳德衛輝等府睢鄭等州滎澤陽武尉氏通許
杞縣祥符儀封河陰新鄭陳留長葛蘭陽臨漳安陽新
鄉等縣申各准委官判官等官王憲等牒成化三年六
月內巡視得恒山等地方間有飛蝗過落及蟲蝻生發

食傷禾稼督令火甲人等打捕移牒轉達等因到職行
間又據河南布政司并河南按察司分巡河北道僉事
王霽亦呈前因案照先據衛輝等府備胙城等縣申稱
蝗蝻生發已經具題及通行都布按三司原委分巡分
守叅政等官王高分投前去督屬委官設法打捕去後
今據前因除嚴督原委官員打捕另行外臣竊惟蝗蝻
生發固雖天災實關人事人事修則天意可回而災不
為災矣昔卓茂令密邑而蝗不入境茂能修其職也今

蝗蝻為患於河南者豈無故乎良由臣巡撫失職不能敷宣聖化以安民人是致上天以此而譴告耳況臣管內地方連年水旱加以去歲荆襄盜起軍勞於征調民困於轉輸及又今年起運稅糧并勘合買辦物料等件比之往年數多今又遭此蝗蝻之灾軍民何以聊生考之於史宋真宗罷諸營建而飛蝗盡絕此真宗能修德政以應天是以天灾隨之而消也伏望陛下以天戒為可畏以地方為當重將臣罷歸田里另選賢能代理其

事尤望陛下去奢崇儉除祭祀軍需之外其餘一應不急之務無益之事可減省者減省之可停止者停止之使財不妄費民困少舒庶幾天意可回而灾沴可弭矣臣受國重寄值茲灾異不敢循默為此具題

激勸賢能奏狀

節該欽奉勅諭今特命爾巡撫河南地方官吏有能奉公守法修舉政務者量加獎勸欽此欽遵及節該欽奉詔書內一款府州縣官有廉能公正撫字勤勞深得民

心者上司以禮相待仍具其政蹟奏聞以憑旌擢欽此
欽遵除河南布政司所屬州縣見任廉能知州謝光知
縣尚璣王璽胡澄先該巡撫都御史賈銓奏請旌異不
開外今體得開封府中牟縣知縣王敷商水縣知縣羅
楫河南府孟津縣知縣丁政新安縣知縣魏恭俱各廉
能公正撫字勤勞深得民心未經旌擢除欽遵詔書內
事理以禮相待外如蒙乞勅吏部將各官照例量加旌
擢庶使廉能者益加勸勉不才者有所感發緣係激勸

官員事理未敢擅便今將各官畧節政蹟開坐具本謹
題請旨

計開

開封府

中牟縣知縣王敦處事公勤持身廉介耄倪感
德遠近知名

商水縣知縣羅楫不剛不柔無私無偽令行禁
止事妥民安

河南府

孟津縣知縣丁政操持端謹政令公平庶事康
哉羣黎樂只

新安縣知縣魏恭外無浮華中則純確令嚴政
善吏畏民懷

代書辦吏賈儀等請冠帶奏狀

臣先任右副都御史奉勅諭撫治南陽襄陽荊州三府
流民彼因缺人書辦行該吏部題准撥令史賈儀典吏

陸嵩跟隨書辦後因荆襄盜賊節次奉勅命臣公同太監尚書總兵等官唐慎等計議征勦師出數月賊寇殄滅地方底寧伏蒙聖恩念臣前項微勞陞臣右副都御史緣令典賈儀陸嵩一向隨臣在於軍前書辦公文催糧督軍蹈危履險同受辛苦未霑天恩况各吏係是吏部考中例該厯俸三年滿日冠帶正八品出身人數今已厯俸三十箇月止有六箇月未滿照得提督軍務白圭帶去令史陳廉總兵官撫寧侯朱永帶去掾史黃宣和

等俱未及三年已蒙冠帶今賈儀等與各吏事體相同如蒙乞勅吏部照例令各吏冠帶辦事挨次取用如是則勤勞者知所感激而益樂於効力矣緣係激勸事理未敢擅便具題

言吏部不覆請給誥命未當奏狀

臣因父年老於成化三年九月初二日具奏乞請誥命奏奉聖旨吏部知道欽此太醫院使施安院判方賢各為母老於本月初三日具奏乞請誥勅亦奉聖旨吏部


知道欽此該部已與施安方賢覆奏奉聖旨准他却不肯與臣覆奏以致臣不蒙恩典竊思臣與施安方賢同為在京堂上官同為親請給誥勅而該部與施安方賢覆奏不與臣覆奏非惟不遂臣之私實於體未宜伏望皇上憐臣親老一視同仁特勅吏部照依施安方賢事例以臣應得誥命先行給賜使臣父生被光榮非惟臣感恩於無窮而天下之為臣子皆知所勸矣臣為親之心激切干冒天威不勝戰慄之至為此成化三年九月

十三日具題

陞南京刑部左侍郎謝恩奏狀

臣先任都察院左副都御史欽差巡撫河南近准吏部咨欽陞前職臣猥以庸材屢蒙顯擢備員兩省殊無異政持憲三年未有奇勳方虞物議之未平詎料宸衷之不棄特降綸音於北闕俾弼邦教於南京寵命非常驚懷失次臣敢不公忠是勉敬慎自持遵賢哲得情勿喜之言體聖明視民如傷之意庶裨無為之至治少酬莫

大之洪恩臣下情無任除望闕謝恩前去到任外具題



王端毅奏議卷一

欽定四庫全書

史部

王端毅奏議卷二

詳校官侍講學士臣法式善

編修臣裴謙覆勘

總校官進士臣繆琪

校對官中書臣葉莢

謄錄監生臣江晉

謄錄監生臣邵曾蔭

欽定四庫全書

王端毅奏議卷二

明 王恕 撰

南京刑部

彗見地震乞休致奏狀

臣見年五十三歲係陝西西安府耀州三原縣人由進士改庶吉士正統十四年欽除大理寺左評事歷陞寺副知府左右布政使左右副都御史及今官屢被朝廷莫大之恩叨享祿位二十餘年雖夙夜兢惕欲圖報稱

奈學術淺陋終無裨益竊惟災異莫大於彗見地震而
召致之由無踰於刑獄之冤濫茲者彗見於上地震於
下固由臣等諸司官吏不能上體聖心欽崇天道恪修
職務之所致而臣司刑之官失職之罪比衆尤為甚也
伏蒙聖慈特賜優容不加譴罰勉臣等省身脩職以回
天意臣雖至愚豈不知感但臣年力衰憊才德罔稱不
能効用無補明時徒縻廩祿若復包羞固位將來隳政
廢事取譏於人獲譴於天恐不止此伏望聖恩憐憫將

臣放歸田里苟全微體另任賢能大新至治庶幾優劣得所而天意可回矣臣不勝戰慄之至具題請旨

聞父喪復請給誥命奏狀

臣係陝西西安府耀州三原縣人由進士改庶吉士歷任評事寺副知府左右布政使成化元年欽蒙聖恩陞都察院右副都御史成化三年為功次事陞本院左副都御史巡撫河南成化四年四月十六日實歷左右副都御史俸三十六箇月三年考滿給由間本月十七日准吏部咨為

缺官事陞今職命臣就彼赴任管事臣以此不曾赴京給
由就於本月二十九日到任管事訖彼因先任副都御史
應得誥命未曾請給為念臣父年已八十有一惟恐不
能有待已經具奏乞恩請給急欲得之以為臣父生前
一日之榮吏部因臣三年考滿未曾赴京給由不蒙請
給臣父果不能有待於本年十二月二十六日在家病
故臣於成化五年二月十一日聞喪今臣雖欲為父求生
前一日之榮不可得矣仰惟聖朝以孝治天下凡兩京官

曾經三年考滿者照依品職給與誥勅封贈祖父母父母俾各遂其孝親之心誠隆古所無之恩典也中間有為親乞恩者雖未滿三年亦蒙聖慈給與誥勅光被存沒臣先任副都御史三年已滿誤蒙聖恩陞擢今職又將一年任內別無違碍止因未曾赴京給由之故而應得恩典不及其親人子之情豈能自己伏思臣任江西右布政時流賊高安吳廣華等千有餘徒屯聚廣東程鄉縣地方劫掠贛州府縣臣同都指揮王貴督令勦捕

任右副都御史時強徒梁溫汪四等千百餘人在南陽府雙廟兒爭占銀鑛擅立營寨私造軍器幾生他變臣到彼調度設法撫捕俱獲渠魁具奏處置訖況在荆襄殺賊臣亦曾効勞夫為臣伐功固非美德為親乞恩實乃至情伏望聖思念臣節次微勞憫臣愚悃恕臣死罪勅該部給臣先任副都御史應得誥命臣父雖沒得以贈官題寫銘旌榮于殯葬之光于泉壤之下臣生當隕首死當結草臣急於為親自陳無狀干冒天威不勝戰慄之

至謹具奏聞

蒙賜誥命謝恩奏狀

近者欽蒙聖恩賜臣先任都察院左副都御史誥命進
臣階通議大夫贈臣祖父惟真父仲智俱通議大夫都
察院左副都御史祖母張氏母周氏妻蓋氏繼室張氏
俱淑人伏念臣資質凡庸學問庸淺過蒙錄用常切慚
惶志雖不忘乎公才實無補於治况此憂服之日值此
曠蕩之恩龍章降自九重豸服被於三世光榮罕儷寵

幸何加臣敢不殫犬馬之勞答乾坤之造除望闕謝恩
外謹具奏聞

蒙賜葬祭謝恩奏狀

臣父仲智先蒙勅封文林郎大理寺左寺左評事成化
四年十二月二十六日在家病故復蒙聖恩給賜誥命
贈通議大夫都察院左副都御史遣進士蔡晟造墳安
葬陝西布政司右叅政賈傑諭祭今已事畢伏念臣素
乏才猷誤蒙任使雖竭駑駘之力曷酬覆載之仁夙夜

兢慚莫知攸措值慈父違榮於三釜致湛恩降賜於九重既葬既祭逮下之禮無以加載馳驅報上之誠罔敢後除望闕謝恩外謹具奏聞

總理河道

論報管河工程及乞禁馬快船附搭私貨奏狀

節該欽奉勅諭令臣管理一帶河道臣自通州直抵儀真等處往來嚴督郎中等官陸鏞等將一應河道事宜但係日前廢弛損壞者令其逐一漸次修復及將淮安

揚州二府等處淺澁難行河道俱已挑濬深闊但緣淮
揚一帶運河別無泉源止藉高郵邵伯等湖所積雨水
奈何彼處地方自去歲秋冬以來至今一向少雨湖水
消耗慮恐開通閘河走泄水利愈致淺涸已令淮安府
暫於清江閘越河并新莊閘下添設二壩車盤船隻及
令揚州府委官前去瓜州儀真等處車戽江水接濟臣
在揚州府躬率官吏人等設壇祈禱雨澤待有水之時
撤去新莊壩方開閘河照得去年因是揚州等處久旱

不雨遂致糧運遲滯今又似前乾旱臣以為當斯之時
北有守凍回還等項船隻南有白糧并各衛所兌運船
隻一往一來相挨而行又有南京裝運官物馬快船隻
日逐相繼而來每起或五七十隻或三四十隻且又船
大載重難為撐駕其餘運糧等項船隻一見前來舉皆
退避讓路動經數日不敢前進及到閘河積水雖不滿
板亦須通閘開放閘內運船不無淺閣兼且往年江北
衛所運船俱在瓜州淮安等處交兌比及三月已完八

九完者就行尚以為遲今年俱往蘇松等處兌運今有三月將半兌完而回者僅見一二若不預為處置誠恐糧運遲滯非惟負累軍士抑且有誤國計如蒙乞勅該部計議合無速行南京守備內外官員將年例該進鮮物依期撥與快便船隻裝送仍禁約夫甲人等不許裝載江米板片磁器等項重物在內其餘裝運竹木馬槽等項物件者暫候有水時月逐起發運庶幾京儲不致遲誤軍民得其便益成化八年三月十二日具題

言開河事宜并乞先修舊塘水閘奏狀

臣看得揚州一帶河道南臨大江北抵長淮別無泉源止藉高郵邵伯等湖所積雨水接濟湖面雖與河面相等而河身比之湖身頗高每遇乾旱湖水消耗則河水輒為之淺澁不能行舟若將河身濬深三尺則湖水自來河水自深雖遇乾旱亦不阻船前向河道自南至北四百五十餘里中間除深闊不用挑濬外其淺窄可挑濬去處尚有二百餘里約用九萬餘人六十工可完每

人日給口糧二升該用糧米一十萬八千餘石捲埽打
壩共用椿木一萬六千餘根草二十餘萬束及看得高
郵湖自杭家嘴至張家溝南北三十餘里俱係磚砌隄
岸每遇西風大作波濤洶湧損壞船隻失落錢糧人命
不可勝計况前項隄岸之外地勢頗低若再濬深三尺
闊一十二丈起土以為外隄就將內隄原有減水閘三
座改作通水橋洞接引湖水於內行舟仍於外隄造減
水閘三座以節水利雖遇風濤亦無前患若興此役約

用一萬三千餘人六十工可完每人日給口糧二升該
用糧米一萬五千六百餘石合用築隄樁木五萬四千
餘根草二十七萬餘束造減水閘并改造通水橋洞約
用樁木磚石等料并工價銀二百餘兩又看得揚州灣
頭鎮迤東河道內通通泰等五州縣二千戶所富安等
二十四鹽場其間有魚鹽柴草之利在前河道疏通之
時二千戶所運糧船隻俱在本所艤脩客商引鹽裝至
儀真每引船錢不過用銀四五分揚州柴草每束止賣

銅錢二三丈近年以來河道淤淺不曾挑撈加以天旱雨少河水乾斷舟楫不通魚鹽柴米等項俱用旱車裝載二所運糧船隻不得回還本所牛車脚費柴米價高以致客商失陷本錢軍民不得聊生前項河道自灣頭起至通州白浦止三百四十餘里俱用挑闊八丈深三尺約用八萬五千六百餘人六十工可完每人日給口糧二升該用糧米十萬二千七百九十餘石再看得雷公上下塘勾城塘陳公塘俱係漢唐以來古蹟各有放

水減水閘座年久坍塌遺址見在近年以來止是打造土壩攔水隨修隨坍不能蓄積水利若每塘修造板閘一座減水閘二座潦則減水不致衝決塘岸旱則放水得以接濟運河以上四塘共造放水板閘四座減水閘八座除舊有磚石外約用磚石樁木等料價值并匠作工價銀二千餘兩臣雖無識詢之于衆咸以謂若將以上三件河道依前整理庶幾舟楫疏通永無淺阻風濤之患而為往來軍民無窮之便也但係前項工程浩大合

用人力錢糧數多况揚州府地方連年灾傷人民窮困
己極倉庫錢糧不敷兼且邇來玄象示警邊境不寧人
心驚疑如斯之役未易輕舉須候時和歲豐人力寬舒
方可為之惟修理陳公等塘閘座一事既不起倩人夫
止用前項工價為之頗易如蒙乞勅該部計議合無於
本府收貯解京船料銅錢內委官支給收買物料脩造
閘座亦可以蓄積水利接濟運河為此成化八年三月
二十二日具題

乞罷巡河管泉等項官員奏狀

准本部咨准吏部咨該欽差印綬監太監韋煥題裏河
一帶自通州直抵儀真等處雖有巡河御史等官因無
專主等待更替致使河道連年淤淺阻碍船行具題抄
出該吏部會同戶工二部計議奏奉欽依自通州至德
州一帶河道著郎中陸鏞專管自德州至濟寧一帶著
副使陳善專管自沛縣至儀真瓜州一帶著郎中郭昇
專管仍請勅命臣總理其事嚴督沿河一帶巡視等官

并軍衛有司人等凡前項河洪閘壩湖泊泉源鋪夫井樹及一應河道事宜根究本末設法措置以次修復不許諸人侵占阻滯務在通行經久利便其見在管河巡河管泉等項官員應否去留宜從總理河道官處置定奪行移到臣除領勅前去沿河一帶提督郎中等官陸鏞等并軍衛有司人等將河洪閘壩湖泊泉源鋪夫井樹及一應河道事宜根究本末設法措置漸次修復候工程完日另行具奏外查得揚州府一帶河道見有主事

崔陞管理淮安府一帶河道見有漕運衙門問刑主事
游佐并清江浦提舉司督造船隻主事屠勲兼管徐州
洪有主事王道專管呂梁洪有主事謝敬專管濟寧南
北天井等二十閘主事過璘專管臨清至荊門一十五
閘衛河提舉司督造船隻主事南鵬兼管濟寧迤南至
儀真瓜州又有御史方中專管巡河迤北至直沽等處
又有巡鹽御史兼管巡河兗州等處又有主事張盛專
管泉源臣看得徐呂二洪濟寧州天井在城趙村三閘

臨清縣新開等四閘最為緊要不可一日無人管理其餘河道閘壩泉源今既令郎中陸鏞副使陳善郎中郭昇等專管若又存留管河巡河管泉主事御史管理非惟甲可乙否掣肘難行抑恐互相推托因而悞事合無令主事王道專管徐州洪謝敬專管呂梁洪過璘專管濟寧天井在城趙村三閘并上新下新宮村吳泰四閘南鵬兼管臨清縣新開等四閘其餘一應河道閘壩泉源等項著陸鏞郭昇陳善各照原分地方管理將管河

主事崔陞管泉主事張盛巡河御史方中取回其餘問
刑造船主事巡鹽御史兼理河道者令其止管本等事
務不必似前兼理庶幾事體歸一易於責成緣係該部
奏奉欽依見在管河巡河管泉官員應否去留宜從總
理河道官處置定奪事理未敢擅便具題

言詔令不可失信奏狀

臣聞信者國之寶民之所依以立者也詔者國之號令
敷恩澤感人心而示之以必信者也易曰渙汗其大號

言號令如汗之出而不反也書曰慎乃出令令出惟行弗惟反言號令之出不可不謹行之不可不信也魏文侯小國之君不失虞人之期商鞅霸者之佐不廢徙木之信矧為億兆之君師者乎庸言亦信庸行亦謹矧布詔令於四方者乎臣伏覩詔書內一款自成化七年十一月十六日昧爽以前官吏軍民人等有犯除謀反大逆謀叛子孫謀殺祖父母父母妻妾殺夫奴婢殺主蠱毒魘魅毒藥殺人強盜人命妖言不赦外其餘已發覺

未發覺已結正未結正罪無大小咸赦除之敢有以赦
前事相告言者以其罪罪之欽此臣聞順德府知府蔡
永明止因毆公差人員獲譴浙江布政使等官劉福等
止因織造段疋不如法致罪別無另項重情況又犯在
革前今却以降調等項發遣是前項明詔不信於天下
也設或此事傳播四方使懼罪逃躲反側不安者聞之
誰肯自首求免乎臣恐由是幅幘之內人懷危疑倘有
不虞之事發咫尺之書求濟一時之急誰復肯信不信

則不從不從豈不誤朝廷之大事乎議者以為生殺予奪由朝廷臣下豈宜妄議臣愚以為理之當生殺予奪而生殺予奪之可也不當生殺予奪而生殺予奪之未可也若賞一人而千萬人勸則賞之罰一人而千萬人懼則罰之此公天下之賞罰則所謂理之當生殺予奪而生殺予奪者也賞一人而千萬人不勸則謂之淫賞罰一人而千萬人不懼則謂之濫罰此非公天下之賞罰即所謂理之不當生殺予奪而生殺予奪者也且君

以聽言為明臣以進言為忠朝廷賞罰合乎宜臣固當
將順之未合乎宜亦當匡救之豈可以越人視秦人之
肥瘠忽焉而不加喜戚於其心乎然黎永明等之事雖
曰出自一時聖斷而執法之官亦不能辭其責何則漢
文帝時張釋之為廷尉文帝欲重犯蹕之罪釋之曰當
罰金文帝怒釋之曰法者天下之公共也今法如是更
重之是法不信於民也且廷尉天下之平也一傾天下
用法皆為之輕重民安所措其手足文帝從之其後文

帝又欲族盜高廟器者釋之曰當棄市文帝怒釋之謝
曰法如是足也今盜高廟器而族之假令愚民取長陵
一抔土陛下且何以加其法乎文帝許之至今百世之
下莫不稱文帝之仁明釋之之執法設若初發落黎永
明等之時法司能如釋之之執法以奏陛下聖明寬仁
未有不賜俞允黎永明等未有不蒙曠蕩之恩天下後
世未有不稱陛下如文帝稱今之法司如釋之者然而
此事雖小害信為大臣之所以懇懇為陛下言者不但

為黎永明等惜為天下惜不但為天下惜實為朝廷惜也倘蒙陛下不棄芻蕘之言將黎永明等並依革前宥之使復其職庶明詔可以取信於天下而不誤事於將來矣臣愚更望陛下自今伊始凡罪之當罰者雖貴近必罰功之當賞者雖疏遠必賞發一號令出一詔旨亦宜熟思審處求合人心然後付之有司行之天下如金石之堅如四時之信使萬姓咸悅遠近歸心又何患中國之不安四夷之不服哉若賞罰過當號令不一曰治

曰安非臣之所能知也臣以菲材叨司邦刑知而不言是謂有隱伏乞皇上憐其直赦其罪不勝大幸

言運船前進回淮楊修理河塘壩座奏狀

臣先准戶部咨提督分管河道郎中等官并沿河一帶軍衛有司整理河道催僨糧船七月十八日等日淮楊地方風雨大作山水泛漲衝決河塘壩座損壞隄岸隨即提督各該委官整理修築緣工程浩大卒急難完已將糧船俱過揚州月日及修理河塘壩座畧節緣由各

另具題外近准吏部左侍郎尹旻咨為督催漕運事臣
又公同本官并總督漕運左僉都御史張鵬等往來提
督催儻糧船昨在德州已將河道近頗有水并糧船所
過地方緣由具題外今臣已抵直隸河間府靜海縣地
方查得各衛所糧船已到京通州等倉上納及過天津
迤北者約有十之七過臨清者約有十之九俱已晝夜
前進無阻况有侍郎尹旻等催儻處置事必停妥臣欲
候糧船俱到通州之日前去督修淮揚河塘壩座誠恐

冬深土凍前工難成有悞來年漕運之計未便除於十月初一日前去淮揚督修河塘壩座外謹具題知

言管河官應否添設奏狀

准工部咨都水清吏司案呈准戶部四川清吏司手本奉本部送戶科抄出巡按直隸監察御史婁謙題五事內一件整理河道事看得管河官員原無額設俱係沿河軍衛有司委官管理各多懦弱無為更易不常以致責無所歸事鮮成效見今雖有工部郎中陸鏞等官分

投管理然亦不過提其大綱而已若欲事有定規必須
官有專主查得臨清濟寧沿河一帶府州縣分俱有額
設管河官員如蒙乞勅該部計議合無自通州直抵臨
清除各府州并全設縣分照舊委官管理外其餘裁減
縣分照依臨清迤南事例添設管河官一員不許別項
差使各另專一管理河道等因該通政使司官奏奉聖
旨該部知道欽此欽遵備由手本到司案查近該欽差
總理河道刑部左侍郎王題稱自儀真直抵通州一帶

河道閘座泉源照依原擬分與郎中等官陸鏞等管理
要將管河主事崔陞管泉主事張盛巡河御史方中取
回其餘造船主事巡鹽御史兼理河道者令其止管本
等事務庶使事體歸一易於責成等因本部已經依擬
覆奏通行遵守去後今巡鹽御史婁謙又奏前因案呈
叅照所奏要於裁減縣分照依臨清迤南事例添設管
河官員一節未審有無相應違礙合就移咨斟酌應否
務合時宜徑自施行備咨准此照得通州直抵臨清一

帶河道委的多有灘淺旱則阻滯船隻潦則衝決隄岸
常要扒撈修築必如御史婁謙所言將前項地方裁減
縣分照依臨清迤南事例添設管河官員專一管理方
能有濟但沿河順天府所屬七州縣河間府所屬十州
縣廣平府所屬中間止有武清一縣原設淺鋪修隄等
項人夫二百三十名却係全設衙門其餘裁減縣分人
夫多者不過百餘名少者止有三五十名比之臨清迤
南縣分河道工程人夫數目不及十之一二若各添設

官一員專管俸祿僕馬不無煩擾及查得沿河揚州府所屬四州縣淮安府所屬六州縣徐州并所屬沛縣中間開壩洪淺湖塘等項最為緊要每處所設各項人夫多者數千名少亦不下數百名每歲修隄打壩等項費用樁草等料數百萬計前項府州縣亦無添設管河官員止是委官管理若府州縣所委官員專一往來督屬整理亦不誤事柰何常被巡撫巡按等官差委勘理別事動經旬月不到河塘況所屬委官多不得人雖有分

管河道郎中等官地方廣遠一時照管不及未免有誤如蒙乞勅該部計議合無照例將順天河間揚州淮安四府各添設管河通判一員徐州添設管河判官一員專一督同所屬官吏委官整理河道一應事務俱不許別項差遣仍令分管河道郎中副使等官往來提督比較如此則官亦不繁事亦可集緣係工部行令臣斟酌應否務合時宜徑自施行事理未敢擅便具題

言裏河一帶災異奏狀

去年自京師直抵揚州南北三千餘里水旱災傷五穀
薄收軍民艱食今歲正月初間止得一雪自雪後至今
八十餘日雨澤少降狂風迭作飛沙揚塵遮天蔽日彌
月不止田地乾燥河水耗散麥苗出土多被沙壅穀種
雖下未曾萌芽臣又訪得臨清武城至德州一帶地方
三月初四日申時分有黑氣自西北而來忽然晝晦出
手不見掌比之夜間天陰無星月之時黑暗尤甚移時
方退民心十分驚愕不寧臣雖不通術數亦知其非休

徵也但沿河一帶軍民目今已自十室九空缺食糊口
父母兄弟離散妻子不相顧流移死亡不可勝數若到
四月間再不降雨二麥恐無所望富者亦難存活臣往
來河道之間目擊耳聞豈忍循默伏望皇上以宗社為
念特降香帛遣官分祭各處山川之神祈禱雨澤以濟
枯涸以慰民望以固根本仍詔廷臣講究弭災卹患之
策求其至切至要可以回天意可以安民心可以延國
祚於億萬年者而力行之必有效驗臣不勝大願為此

具題該禮部覆奏奉聖旨山東百姓既十分艱難須行
實惠便降詔將今年稅糧等項盡行蠲免順天等府有
災傷處也量宜減免祭告遣侍郎劉吉就著關領香帛
銀兩去

山東得雨河道疏通奏狀

今年三月十二日臣自通州南下本月二十五日到東
昌府武城縣已將沿河地方自正月以來雨澤少降狂
風迭作田地乾燥河水耗散乞請香帛祈禱等項緣由

具題外四月初四日臣至濟寧訪得本州於三月二十
八日夜得雨一陣不久而止至魚臺詢訪得雨日期與
濟寧同而其勢頗大其雨止可潤地河水無增四月十
五日晚至古城驛遇雨至次日早方止河水頗增自古
城而下至淮安至揚州河水深濶船隻無阻臣復自揚
州北上整理河道催儲糧船五月初五日到宿遷縣地
方偶遇河水泛漲比舊約增五六尺之深詢問北來公
差官員皆說近日山東徐州等處得雨閭河一帶俱有

飽水臣又訪得未得水時泗州淮安等衛糧船到宿遷等縣陸家墩等淺俱曾起剝得水之後臣親見懷遠沔陽新安鳳陽儀真留守左等衛糧船至彼皆不起剝又得順風俱各張帆而行滔滔無阻畧不費力軍民懽悅皆曰今年得水早糧船比舊年定然早到此皆朝廷洪福軍民賴之臣職專河防久旱之餘遇茲大水豈勝忻忭除儲糧船日夜前進外緣係河道得水糧運疏通事理具題

改南京戶部左侍郎謝恩奏狀

臣先任刑部左侍郎欽差總理河道近准本部咨准吏部咨欽改前職伏念臣材質凡庸學術疎淺偶中春闈之選麗紬秘閣之書任評事任寺副恒憂讞議之未明為知府為布政每懼承宣之無狀兩副都憲而左以右陞再佐秋官而北由南轉食祿年久感恩日深雖迫桑榆之年難忘聖主豈知錢穀之託遽及愚臣撫己若驚覩顏就列臣敢不堅持晚節益勵初心竭犬馬之微勞答乾

坤之大德臣無任感天荷聖激切屏營之至除望闕謝恩前去到任管事外謹題

南京戶部

處置運糧餘丁月糧奏狀

廣東清吏司案呈抄蒙欽差南京守備太監安寧等節該欽奉勅爾等會同將南京各該衛所旗軍并新江口等處寄操旗軍查勘酌量選補運糧若正軍數少即將殷實餘丁點湊照依正軍事例免其一丁差使幫貼月

支米一石養贍家口行糧賞賜一體關給欽此欽遵除該年依勅選補外自是以後各衛所餘丁因見運糧者月支米一石又有行糧賞賜別差者無有糧賞所以皆願運糧而不願別差衛所官吏受其請屬凡遇運糧旗軍逃故多不於正軍內選差輒將餘丁撥補甚有將在運旗軍捏故掣回改差就以餘丁更替及至逃故等項旗軍復役補役又不送去上運替回餘丁改差所以食糧餘丁一年多似一年在倉糧儲一歲少如一歲又如

在外衛所旗軍有月支本色米八斗者有月支本色米六斗者而運糧餘丁一例俱支米一石比運糧正軍支米反多若不處置非惟錢糧妄費抑且恩澤不均案呈如蒙乞勅該部計議合無通行內外軍衛衙門今後不許將運糧旗軍捏故掣回改差果有逃故等項仍照先奉勅書內事理先儘操備等項旗軍查勘酌量選補若正軍數少方許將餘丁點湊如運糧逃故正軍復役補役即令上運替回餘丁改差在外衛所運糧餘丁若該

衛所正軍食糧一石者亦與糧一石食糧八斗者亦與糧八斗食糧六斗者亦與糧六斗不可使餘丁食糧多於正軍其選補運糧旗軍餘丁俱於運糧完足回營之日選補仍將選過餘丁造冊南京各衛送南京戶部在外衛所送所在有司查照收糧敢有不先儘正軍選補及將運糧正軍捏故掣回改差濫點餘丁頂替虛費錢糧者叅奏拏問如此則錢糧不至於虛費而恩亦庶乎均一矣具題

申明茶法奏狀

陝西清吏司案呈卷查應天府批驗茶引所直隸常州府宜興縣張渚批驗茶引所浙江杭州府批驗茶引所節次關去茶引自成化元年起至成化十年止陸續共關過茶引五十八萬三千六百六十一道前去發賣各處茶商照賣茶勛累催不見銷繳查得本部先於景泰五年為因各處茶商人等多將舊引影射私茶不行銷繳查照清理鹽法事例具奏該戶部依擬奏准出榜曉

諭及行各處巡按巡鹽巡河巡江監察御史監收船料
提督洪開郎中等官禁治搜檢各批驗所追繳退引等
因已經通行遵守外今照前項退引累催不繳其故蓋
因批驗所不置簿籍附寫茶商姓名貫址或不照茶商
路引聽其冒名開報或將引由賣齋產茶地方轉賣與
人如此欲得的確名籍行追繳引難矣况茶貨出山經
過官司既不從公盤詰又不依例批驗縱有夾帶勦重
多是受財賣放彼何畏憚而不停藏舊引影射私茶又

如南直隸常州府廬州府池州府徽州府浙江湖州府嚴州府衢州府紹興府江西南昌府饒州府南康府九江府吉安府湖廣武昌府寶慶府長沙府荊州府四川成都府保寧府重慶府夔州府嘉定州瀘州雅州等處俱係產茶地方相去前項三批驗所遠者數千里近亦不下數百里若照引內條例聽茶商徑赴產茶府州納課買引照茶於人為便理必樂從誰肯不買引由公犯茶禁令却令茶商皆來此三所買引路途寫遠往返不

便欲其一二遵依不作前弊亦難矣况批驗所退引該
與截角今前項三所卻管賣引不行批驗照退名實不
稱有乖職掌呈乞施行等因到部臣等竊惟印造茶引
鹽引禁治私茶私鹽係是太祖高皇帝舊制今官不修
職民不守法茶禁廢弛一至於斯若不申明禁約非惟
虧國家之課程抑恐壞祖宗之制度合無請給聖旨榜
文通行天下曉諭今後園戶賣茶及茶商興販茶貨造
引給由與夫批驗納課等項務要俱遵引由內條例數

內惟買引一事免其納錢只照見行事例每引一道納鈔一貫中夾紙一張仍令前項產茶府州斟酌所管地方每歲可出茶貨若干合用引由若干預先具數差人赴本部關領前引回還收貯出榜召商中買仍要辯驗茶商路引果無詐偽即將其人姓名貫址附簿將引給與年終該府州各將賣過前引造冊就將收過紙鈔差人一同解繳本部鈔送該庫交收紙劄造引仍具數領關次年合用引由各批驗所如遇茶商經過務依例逐

一批驗將引截角如無夾帶即便放行若有夾帶就連人茶挈送本處官司問理年終將批驗過客商姓名貫址并引數目及盤獲私茶起數緣由造冊申達所轄轉繳本部查考如有日前停藏舊引未曾繳報者榜文到日限三箇月以裏赴所在官司告繳與免本罪敢有不遵條件興販私茶者許巡按巡鹽巡河巡江監察御史監收船料提督洪閘郎中等官及各該軍衛有司守把關隘人員挈問挑擔馱載及引領牙行停藏之家俱依

律治罪盤獲私茶并盤車船頭畜等物俱入官如將引
由照茶依例批驗截角賣畢隨將赴往賣所在官司告
繳封送原引衙門通類解部查銷若有過期不繳者
原領引衙門查報各該巡按監察御史按察司提問追
繳如此則職掌定而政務修法令明而姦蠹息緣係申
明舊例清理茶法事理未敢擅便今將茶引由內條例
開坐具題

計開

一茶引由內茶引一道納銅錢一千文照茶一百
觔茶由一道納銅錢六百文照茶六十斤見行
事例每引由一道納鈔一貫中夾紙一張

一諸人但犯私茶與私鹽法一體治罪如將已批
驗截角退引入山影射照茶者同私茶論

一客商興販茶貨先赴產茶府州具報所賣斤重
依例納課買引照茶出境發賣如至住賣去處
賣畢隨即於所在官司繳納原引如或停藏影

射者同私茶論

一山園茶主將茶賣與無引由客商興販者初犯
笞三十仍追原價沒官再犯笞五十三犯杖八
十俱倍追原價沒官

一茶引不許相離有茶無引多餘夾帶並依私茶
定論

一客商販到茶貨經過批驗所須要依例批驗將
引由截角別無夾帶方許放行違越者笞二十

一偽造茶引者處死籍沒當房家產告捉人賞銀

二十兩

一賣茶去處赴宣課司依例三十分抽一分芽茶
葉茶各驗價直納課

一販茶不拘地方

欲令兩淮山東長蘆三運司將鹽引紙每張納鈔
一貫奏狀

陝西清吏司案呈照得本部先行收貯各運司送納印

刷鹽引紙張數多奏准行移兩淮山東長蘆三運司每紙一張折收鈔一貫解送本部轉送南京內府收貯以爲文武官員旗役人等折俸支用其餘兩浙等運司仍用紙張後因紙有不敷又經奏准照舊納紙外今查得本部遞年收到各運司送納印刷鹽引紙除支用外見有七百一十餘萬張在庫約穀七八年支用外若再收紙積之年久不無損壞況今南京內府收貯鈔貫數少不穀折俸買辦等項支用案呈如蒙乞勅該部計議合

無照例仍行兩淮山東長蘆三運司自文書到彼日為始各將該納印刷鹽引紙張暫且停止令其每紙一張納鈔一貫差人解部轉送南京內府交納本部照數換與鹽引兩浙等運司仍照收紙如此則紙張不致損壞而鈔貫亦可以備用矣緣係處置鹽引紙張易鈔備用事理未敢擅便具題

欲令公侯駙馬伯具印信文書關支祿米奏狀

陝西清吏司案呈照得南北二京公侯駙馬伯祿米逋

年差人俱赴本部關支本部照依戶部咨文內開來數
目於蘇松常三府運到秋糧米內撥支緣各官差來舍
人家人人等俱無印信公文投部止是照驗各人路引
撥與及至關支完日原引隨身帶回本部無可備照設
若有等冒名告關無憑查考且如已故寧陽侯陳潤妻
唐氏與新襲爵寧陽侯陳瑛告爭祿米只為頂名關支
至今爭訟未息慮恐今後亦有此弊若不處置深為未
便案呈到部查得北京大小文職官員差人關支三分

四分俸糧俱各齎有本衙門印信手本到於南京該衙門造來糧冊查對相同然後給與俸帖照數關支所以事無差池卷亦明白如蒙乞勅該部計議合無行移兩京公侯駙馬伯今後關支祿米亦照前例不分坐府管事不管事公差在外合行移該府或附近相應衙門令首領官吏具印信手本若衙門品級亞於本部者令堂上官吏具印信手本各開該支祿米數目并差來關領之人姓名就付本人齎執前來關支仍照先年奏准限

期赴部查對明白立案關支如此則真偽易於查考而
祿米不至冒支矣為此具題

改左副都御史巡撫雲南謝恩奏狀

臣先任河南布政使司左布政使成化元年欽蒙聖恩
陞都察院右副都御史仍支從一品俸歷陞本院左副
都御史南京刑部左侍郎改刑部左侍郎再改南京戶
部左侍郎今又蒙聖恩改臣前職巡撫雲南伏念臣本
草茅賤士樗櫟庸材誤蒙聖恩節次遷轉粉骨碎身不

能補報雖雲南遠在萬里之外夷情不常難於撫治臣
敢不罄竭駑鈍敷宣德意以圖萬一之報除望闕謝恩
前去理事外成化十二年九月十二日具題

欲帶男承祿隨侍奏狀

臣原任南京戶部左侍郎欽蒙聖恩改臣前職巡撫雲
南竊緣雲南遠在萬里之外古謂不毛之地水土與北
方不同北人到彼難為調理臣生長北方況今年踰六
十日漸衰老非親人隨行不可伏望聖慈憐憫容臣帶

男王承祿前去朝夕扶持看視飲食勉力圖報不勝感戴之至成化十二年九月十二日具題

王端毅奏議卷二